

摘藻堂四庫全書薈要

經部

欽定四庫全書薈要

經部

日講書經解義卷四

詳校官祭酒臣韋謙恒



欽定四庫全書薈要卷七百六十四

經部

日講書經解義卷四

商書

此書是商史臣記商朝君臣之言語政事共十七篇
契始封商湯因以為有天下之號

湯誓

此一篇書是商王湯伐夏而誓師于亳都之詞

王曰格爾衆庶悉聽朕言非台小子敢行稱亂有夏多

罪天命殛之

此一節書是商王湯誓師伐夏而首言奉天討罪之意也格來也台我也稱猶言舉也商王湯曰來爾衆多百姓皆聽我言今興兵伐夏非我小子敢以臣犯君行此悖亂之舉也蓋人君體天心以子愛其民然後可長保天命夏王桀虐民而慢天其罪非一天厭其惡命我誅殛之故不得已而奉行天討豈我之輕于用兵哉夫誓師之初先以稱亂為懼可見伐夏非

湯之本心奉天命也桀以慢天而亡湯以畏天而興
非萬世炯鑒乎

今爾有衆汝曰我后不恤我衆舍我穡事而割正夏予
惟聞汝衆言夏氏有罪予畏上帝不敢不正

此一節書是商王湯申言天命所在諭商民以伐夏
之不得已也穡事農家收穫之事割裁也商王湯曰
我奉天命伐夏甚非得已今爾衆民但見汝在亳邑
之安乃曰我君不體恤我衆民舍我亳邑收穫之事

而興兵動衆裁正有夏之罪我亦聞汝衆論憚于勞役如此然夏王桀得罪于天天既命我誅之我畏上帝之明命不敢不往正其罪豈得徇爾毫衆以偷安哉當時商邑百姓安于湯之德政故不被桀虐則不知桀罪徒見往伐為勞然湯以順天應人之舉猶必委曲開諭如此聖人之信而後勞其民於此可見矣今汝其曰夏罪其如台夏王率遏衆力率割夏邑有衆率怠弗協曰時日曷喪予及汝皆亡夏德若茲今朕必

往

此一節書是商王湯正言夏桀暴虐之實以見伐夏救民之不可緩也過絕也割戕也時解作是商王湯曰天命討夏即于民心怨夏見之今汝衆民意中或曰夏王桀雖有暴虐之罪但害得夏民其如我商民何不知夏民猶之吾民也人情莫不欲逸夏王桀率為重役以過絕夏衆之民力人情莫不欲安夏王桀率為嚴刑以殘割夏邑之民生所以夏衆離心皆怠

于奉上弗相和協因夏王桀自言吾有天下如天之
有日遂指日而怨曰是日何時亡乎若亡則我寧與
汝皆亡蓋欲其亡之甚不復堪此重役嚴刑之困也
夏王桀之惡德為民所怨恨若此忍坐視而不救哉
今我決計往伐以速慰夏民之望而已蓋民心向背
即天命之所以去留易言湯武革命順乎天而應乎
人聖人豈有私天下之意哉

爾尚輔予一人致天之罰予其大賚汝爾無不信朕不

食言爾不從誓言予則孥戮汝罔有攸赦

此一節書是商王湯示賞罰之明斷以肅軍心也商王湯曰伐夏之舉既不容已爾將士庶幾同心同力輔我一人致天之罰于夏是能上順天命下救民困也我則以顯爵榮祿大賜賚于汝等爾將士無得猜疑我言既出決不自食其言賞之必厚如此爾將士若不從我誓言觀望退縮是以天命不足畏民困不足恤也我則不但戮汝身併戮汝妻子無有所赦罰

之必重如此可不戒勉哉商王湯賞罰之令與夏王
啟甘誓同可見行軍治兵之際以賞罰明斷為主賞
罰不當則恩不足勸而威不足懲欲以成功難矣故
曰用賞者貴信用罰者貴必

仲虺之誥

此一篇書是商臣左相仲虺解釋商王湯伐夏之慙
而因進以勸勉之詞軍旅曰誓會同曰誥此對衆告
君兼以曉諭臣民故亦謂之誥

成湯放桀于南巢惟有慙德曰予恐來世以台為口實
此一節書是商史臣序仲虺作誥之由也武功成故
曰成湯口實謂藉口以為指實商史臣曰我商王成
湯興兵討夏桀之罪桀出奔南巢因放置桀于此地
遂代夏而有天下所以順天命應人心也乃成湯自
思堯舜禹禪讓以來今日始行放伐之事慙愧其德
不如古且自言曰伐夏之舉我雖自信其不得已但
恐來世有亂臣賊子輒以我今日之事藉口為指實

則開禍階于無窮此所以深自慙也蓋天人之運雖
交會而君臣之義無可逃成湯之慙于往昔恐于將
來非特慎萬世之大防亦以存天理之本心也後之
窺竊神器者或反借禪位為口實何其喪心尤甚哉
仲虺乃作誥曰嗚呼惟天生民有欲無主乃亂惟天生
聰明時又有夏昏德民墜塗炭天乃錫王勇智表正萬
邦纘禹舊服茲率厥典奉若天命

此一節書是仲虺作誥以釋成湯之慙而先推本于

天立君之意也塗塗泥炭火也續繼也仲虺因成湯以伐夏為慙乃作誥以解之歎息而言曰天為民而立君非徒虛擁尊位也惟天生斯民有形體即有嗜欲使無主以治之各逞其欲而相爭乃至於亂惟天不忍其亂每于生民中特生一資稟聰明不蔽于欲之聖人立為斯民主敷教行政以治民之欲而息其爭亂焉夏桀為民主反行昏德暴虐其民陷民于塗泥炭火既失其所以為主矣天念斯民之無主乃篤

生我商王錫之以勇足有為智足決幾之德使之表
正萬邦之民而繼大禹舊所服行之常道以盡乂民
之責此天意也今亦但率循其常道以奉順天命而
已何慙之有蓋典常之理出于天大禹所服行古今
帝王所率由無非共此常理夏之子孫不能繼成湯
繼之故不言革命而言奉若此可見天命無私仲虺
非專為釋慙亦正告以人主責任重大也

夏王有罪矯誣上天以布命于下帝用不臧式商受命

用爽厥師

此一節書是申言天命屬湯之意也矯誣謂造作虛辭以惑民聽臧善也式用也爽是昭明之意師衆也仲虺曰有夏昏德既塗炭其民而獲罪于天矣桀知民心不從反矯託天意誣造虛辭以宣布命令于下其背亂已甚故天用不善其所為乃使我商受命而為生民主蓋以桀有昏德百姓皆被其汚染故命我王以勇智之德為之君師用昭明其庶衆使天下皆

有以自新而升斯世于昭明也天之命我王者如此則伐夏之舉豈容已哉何慙之有夫天下視君德為風俗為人君者修德以爽師此所謂自新以新民而承天之實不外是矣

簡賢附勢寔繁有徒肇我邦于有夏若苗之有莠若粟之有秕小大戰戰罔不懼于非辜矧予之德言足聽聞此一節書言桀之忌湯已甚而湯之得民愈深也簡謂簡慢繁謂衆多肇始也仲虺曰夏王既已不道而

其所任用者又皆簡慢賢哲阿附權勢之人同惡相濟徒衆寔多其不與惡相黨比者獨我邦耳故我商始造邦于有夏之間為桀所忌如禾苗中之有稂莠必遭鋤治穀粟中之有糠粃必被簸揚其深加嫉惡如此所以我商之衆無小無大皆戰戰危懼惟恐以無罪而受其禍蓋彼既恃勢以慢賢則賢者必為其所忌而欲見翦除如此也況我王之德盡善盡美但一稱述又皆厭足人之聽聞而為人所悅服豈不尤

為桀所忌乎則今日之伐夏非特奉天討亦以從人
願也何慙之有哉蓋好善惡惡者天之常理人之常
性桀好簡賢附勢者而惡湯反天之常拂人之性欲
不亡得乎

惟王不邇聲色不殖貨利德懋懋官功懋懋賞用人惟
己改過不吝克寬克仁彰信兆民

此一節書是言湯德足人聽聞之實也不邇謂不親
近不殖謂不聚斂懋者繁多之意仲虺曰我王之德

所以足人聽聞者以其本原澄徹而用人處己無不得其當也凡聲色貨利人所同好惟王于聲色則不邇之于貨利則不殖之蓋惟恐蠱惑心志剝削民財以自即于愒淫入于刻薄也此非純乎天德而無一毫人欲之私者能之乎由是以用人于人之德行優者則崇其品秩兼之衆職以懋其官人之功勞多者則錫之土田旌之章服以懋其賞由是以處己見人有善若己有之而無所不容于己有過即便改之而

無所係吝其用舍之當舉動之宜如此若夫寬仁者
人君之大德然行之不善或反受寬仁之累者有之
惟王克寬廣大中具有節制而不失于縱弛惟王克
仁慈愛中兼有嚴厲而不流于姑息君德昭著實有
感孚一世之理天下亦皆從而信之其臨民之善又
如此此我王之德所以足人聽聞之實也而又何慙
之有哉湯用人處己臨民無不各盡其道而要惟有
不邇不殖之德以致此此以知君心誠萬化之原也

乃葛伯仇餉初征自葛東征西夷怨南征北狄怨曰奚獨後予攸徂之民室家相慶曰徯予后后來其蘇民之戴商厥惟舊哉

此一節書是言民心之歸商非一日也仇餉言與饋餉者為仇攸徂謂所往處徯待也蘇再生也仲虺曰我王之德能彰信兆民者于何見之昔者葛伯無道放廢不祀王使人問之對曰無以供粢盛王乃使亳邑之少壯往為之耕老弱饋送飲食乃葛伯反殺我

饋餉之童子而奪其黍肉是不以為德而反以為仇也王于是不得已而興兵伐之蓋初征實自葛始是時天下國君暴亂者多王即以此仁義之師而并征無道其時四方之民苦于其上之不德而望我王之救之也當王師未至但見東面征討則西方之人胥怨望焉南面征討則北方之人胥怨望焉皆曰奚為獨後我而不先救之也望而不至反出怨言此非實有傷于中而望王之至必不爾也及王師既至則見

其民妻孥相慶曰吾儕困苦待我仁君久矣今我君
來吾儕其死而復生乎惟其望之之深故感之之切
而喜我王之至者又如此也民之歸商其來已久非
一朝一夕之故矣則今日之有天下亦人心之愛戴
有不容已而又何慙之有哉夫惟仁者無敵於天下
湯伐罪弔民民之悅之如時雨降此其所以為仁者
之師乎

佑賢輔德顯忠遂良兼弱攻昧取亂侮亡推亡固存邦

乃其昌

此一節書是仲虺以君天下之道勗王而先言懷諸侯之道也仲虺曰天命初歸之日正人心望治之時王得天下無慙也惟務自盡其為君之道而已彼諸侯之中有才德兼備是謂賢者則當隆其禮遇信任而眷佑之不特增其爵秩已也有積善行仁是謂有德者則當厚其賚予培植而輔助之不但安其土田已也有委身徇國而為忠則當褒顯之以揚其令名

有奉公守法而為良則當獎勸之以遂其所志凡此所以善善也因諸侯之有善而吾所以勸善者當如是也有柔懦無為而弱者當兼并之而治以王官有昏庸不明而昧者當攻治之而削其封地有敗壞法紀是亂者也當殄滅其國而取之有荒淫無度是亡者也當戮及其身而侮之凡此所以惡惡也因諸侯之有惡而吾所以懲惡者又當如是也然皆何容心于其間哉彼弱昧亂亡本有亡之道吾特因其亡而

推之賢德忠良本有存之道吾特因其存而固之耳
夫如是推亡固存好惡一出于正刑賞不涉于私將
見諸侯之善者益知所勸而進于善諸侯之不善者
亦知所懲而不為不善矣邦國不其昌乎王但自盡
其君天下之道可也蓋推亡固存即天之栽培傾覆
此聖人之公也公非仁者不能故曰惟仁者能好人
能惡人

德日新萬邦惟懷志自滿九族乃離王懋昭大德建中

于民以義制事以禮制心垂裕後昆予聞曰能自得師者王謂人莫己若者亡好問則裕自用則小

此一節書是仲虺勉湯以修德檢身之道也懋昭大德者黽勉以明其德之意後昆後世子孫也仲虺曰人主一身為遠近親疎之所繫屬者以其有德也誠使其德日新不已自足維繫乎人心不特近者悅服也萬邦雖遠而亦懷之若志自滿假不能自新不但遠者携貳也即九族至親而亦離之矣今我王之德

雖足聽聞然何可不自勉哉必也振奮精神以勉明
其大德求所為中道者而建立之以為民之準蓋德
者我之所得而中者民所同具也民不能以自中必
君建之民乃有所觀法可使咸歸于中而義禮者又
昭德建中之要也故動則以義制事萬幾當前必裁
決其可否而使無過不及之差靜則以禮制心一念
之萌必慎持其逸豫而使無偏倚之累如是則內外
合德中道立矣且非特可建中于民也即垂諸後世

凡子孫之欲制事制心者其家法自足相承而有餘
裕矣然是道也必學焉而後能之也我嘗聞古人之
言曰人君能虛己下賢求人臣之可法者而師事之
則德崇業廣將天下之善皆歸于己故可以王若驕
矜自恣謂人皆不如我將善日益消而天下之惡皆
歸之矣此亡道也凡事不恥下問而心誠好之則萬
善咸集何等優裕若偏愎自用則一己之聰明所見
不廣其能幾何故狹小也虺述古人之言如此王者

以一身而為中外臣民立極作之君亦作之師使非
虛已下賢隆師問道亦何以為下民之師然則欲盡
君道以垂法其崇師道以立本哉

嗚呼慎厥終惟其始殖有禮覆昏暴欽崇天道永保天
命

此一節書是仲虺告湯以謹始善終之道也仲虺作
誥之終又歎息而言曰天下事善作者必善其成善
終者必善其始未有始之不慎而能安保其終者也

今以我王始有天下若欲長享大業垂之無窮正宜致謹于受命之初耳蓋福善禍淫上天不易之道有禮者天必篤厚而培植之昏暴者天必厭棄而傾覆之此所以天命靡常惟德是視也自今以往惟願兢兢業業敬天之所以福善之道而以禮自持畏天之所以禍淫之道而以暴為戒則可以長保天之休命而膺歷服于無疆矣王可不自勉哉按仲虺作誥首言上天立君之意而末復言天道可畏天命不可恃

可見人君謹始善終惟一敬承天意而已以成湯之聖寧有昏暴不終而棄天命者然猶丁寧訓告至于如此此古者君臣儆戒之義足為萬世法也

湯誥

此一篇書是成湯伐夏即位之後告諭天下之言

王歸自克夏至于亳誕告萬方王曰嗟爾萬方有衆明聽予一人誥惟皇上帝降衷于下民若有恒性克綏厥猷惟后

此二節書是叙作誥之由先言君道所係之重也上帝謂天衷即中字若順也綏安也猷道也成湯既克夏而有天下乃還歸于亳都以退就侯國此時諸侯皆率職來朝則天下已歸湯矣湯乃作誥以大告諭萬方因與天下臣民更始焉王曰嗟爾萬方之衆其明聽我一人之言夫民之所恃以生而使各安于其道者皆是天生之而后成之也惟皇上帝當始生萬民之初即予以至正之則所謂衷也民受此衷以生

但率循其自然皆有不可易之常理謂之恒性獨是
氣稟不齊遂有清濁純雜之異所以不能皆全其性
之固有而安于其道之常故天生民而立之君使司
牧之有政刑以匡其不率有教化以鼓其自新夫而
後愚蒙可開知識可牖則所以變其氣稟之異反其
降命之同惟大君能之也然則為人君者有奉天治
民之責其道顧不重哉蓋至善之理出于天在天為
衷民受之為性后綏之為猷其實一也欲盡人之性

必先自盡其性萬世性學之源其自成湯一言開之乎

夏王滅德作威以敷虐于爾萬方百姓爾萬方百姓罹其凶害弗忍荼毒並告無辜于上下神祇天道福善禍淫降災于夏以彰厥罪

此一節書是言桀失君道以見其當伐也成湯又曰君之于民有綏猷之責如此則當體上天之心以爲心矣今夏王滅仁愛之德而徒事殺戮之威以敷播

虐政于爾萬方百姓爾萬方百姓被其凶害如荼之
苦口毒之螫人不可堪忍咸稱寃于天地鬼神以望
其拯救夫天之道善者福之淫者禍之此常理也今
夏之淫虐已甚故天特降災異明示其罪而誅絕之
使不得復播虐于爾萬方百姓也夫天以民為心天
人相與其幾甚微其應甚捷後世臣乃或謂天變
不足畏亦何言耶

肆台小子將天命明威不敢赦敢用玄牡敢昭告于上

天神后請罪有夏聿求元聖與之戮力以與爾有衆請命

此一節書言己之奉天伐罪以救民也元聖謂伊尹戮力并力也成湯又曰夏王虐害其民天既降災以彰厥罪此乃天命明威之所在也故我小子奉將天命之顯然可畏者不敢赦有夏之罪而必伐之然征伐大事我又何敢自專而不請命于天遂用玄牡之牲敢昭告于皇天后土以請夏桀當問之罪又恐予

一人不克有濟聿求有智有勇之大聖人與之協力
同心共誅無道以與爾萬方百姓請更生之命于天
焉則伐夏之舉正所以祇奉天威而為民立命也烏
容已哉湯為天吏每事必請命于天而又必求天民
先覺之元聖學焉後臣而後收戮力之效然則師臣
寧可少乎

上天孚佑下民罪人黜伏天命弗僭賁若草木兆民允
殖

此一節書言已請命于天而天果孚佑之也孚允皆信也僭差也賁文之著也殖生也成湯又曰我既請夏桀之罪與爾衆人之命于天天果垂憐無辜佑爾百姓故使罪人竄亡屈服于南巢之地上天禍淫之命毫不僭差民之向被其荼毒者皆有生意燦然若草木之敷榮兆民自此信乎其能去虐害之苦而各遂其生養之願也天之佑爾下民不其信與天以生物為心未有不愛下民者人君以天之心為心則順

天而應人矣

俾予一人輯寧爾邦家茲朕未知獲戾于上下慄慄危懼若將隕于深淵

此一節書言已受上天付託之重惟恐不能勝也俾使也輯和也戾猶言罪隕墜也成湯又曰天既亡無道之桀不可令兆民無主乃舉綏猷之責委畀于我一人之身使輯和安定爾邦家之衆上天付託之重如此顧我涼德慮不足以當之常恐得罪于天地而

有不自知之處用是慄慄危懼若下臨不測之險將墜于深淵者然蓋我之責愈重而憂愈大也敢不敬哉古先聖王深知為君之難故無日而不戒懼湯之聖敬日躋誠帝王心學之要也

凡我造邦無從匪彝無即愒淫各守爾典以承天休此一節書是欲羣臣交相助勉以共承天休也造邦新造之國侯邦惟舊商命惟新悉與更始故曰造邦匪彝謂非法也愒淫逸樂之意即就也典常也成湯

戒諭諸侯曰今當革命之初凡我有邦悉宜更始蓋受此綏猷之責者雖予一人而交相盡力共底于輯寧之美者則惟爾有邦是賴也自今伊始無或肆志而從于非法無或縱欲而即于愒淫其各謹爾侯度修其職業恪守典常之道以共承天之休命可也蓋此時諸侯不恤民而助桀者如韋顧昆吾之類湯皆已剪滅猶恐諸侯有染舊邦汚俗者故戒之如此而湯之兢兢業業守典以承天休又不待言矣

爾有善朕弗敢蔽罪當朕躬弗敢自赦惟簡在上帝之心其爾萬方有罪在予一人予一人有罪無以爾萬方此一節書見湯之責己重而畏天之深也簡閱也成湯又諭諸侯曰福善禍淫上天不易之理爾若能守典承休是爾有善我何敢隱蔽而不彰若獲戾上下罪在朕躬我何敢因循而自恕蓋善與罪一一簡在上帝之心天雖高而聽則卑或善或惡報應昭然斷無或爽信乎為君臣者當各盡其道也然天既命我

為萬方之主則我之責為尤重必使天下之民皆不失其降衷之性以安其猷方克盡其為君之職若爾萬方有罪是我一人不能盡綏猷輯寧之道而使斯民陷于不善我之罪不可得而辭若我一人所為不善是我有負付託之重而獲罪于天于爾萬方何與哉天為民立君望之極深湯厚自刻責要亦惟體天之心盡君之道而已

嗚呼尚克時忱乃亦有終

此一節書見成湯始終兢業之心也時是也指上三節所言為君為臣之理忱者懇惻力行之意成湯作誥之終復歎息而戒諸侯曰天下事固創始之不易而善終之尤難君之與臣各有當盡之職不徒知之而在能行之今予一人與爾有邦諸侯庶幾能于是而忱信焉為君者盡其受命之責而輯寧既至則可免獲戾之憂為臣者勉其佐命之功而守典既脩則益永天休之至其亦可以有終矣否則為禍為福惟

天所命又安能保其所終哉成湯灼知性命之理深
識君師之職既凜興亡之故而畏天命之難諶此復
謹始終之圖以見人事之難盡誠聖學之淵源帝王
之家法也一篇之中無非兢業之意旨深哉

伊訓

太甲嗣位之初伊尹述成湯之德而誨導之故以伊
訓名篇

惟元祀十有二月乙丑伊尹祠于先王奉嗣王祇見厥

祖侯甸羣后咸在百官總己以聽冢宰伊尹乃明言烈祖之成德以訓于王

此一節書是史臣叙伊尹作訓之由也元祀即元年侯甸羣后謂侯服甸服之衆諸侯烈祖指成湯史臣曰惟太甲即位之元年十二月乙丑之日此時方居仲壬之喪未親祭宗廟伊尹居冢宰之位乃代祭于商之先王奉嗣王敬見其祖告以即位改元之事維時侯服甸服之衆諸侯來朝見者皆在其位百官各

總攝己職以聽命于冢宰蓋冢宰攝而告廟又攝而
臨羣臣也伊尹以嗣王初立欲其法祖德以紹鴻業
乃以烈祖成湯之成德明白詳悉以告于王焉蓋君
德以謹始為要伊尹當太甲即位之初即以祖德告
之此老成之碩論也

曰嗚呼古有夏先后方懋厥德罔有天災山川鬼神亦
莫不寧暨鳥獸魚鼈咸若于其子孫弗率皇天降災假
手于我有命造攻自嗚條朕哉自亳

此一節書是伊尹欲王鑒夏以自警也若順適之意率循也假借也有命謂有天命者鳴條夏之都邑亳商之都邑哉始也伊尹訓太甲而先嘆息曰我商今日之天下即昔有夏之天下也王亦知夏之所以亡我之所以興乎夏之先王懋敬其德方日新而不已當時宇內協和天災不降山川鬼神莫不奠麗而安享之下至鳥獸魚鼈亦皆順適其性而得遂其生焉蓋夏先王能敬德而獲天休如此及其子孫不能率

循祖德肆虐萬方天于是降災以彰其罪而假手于
我有天命者以誅絕之此由其子孫不德而自速禍
亡又如此蓋夏之所以亡者由造可攻之釁于鳴條
而我商之興則由先王始修德于亳都也然則天命
可畏而不可謾祖德可法而不可恃永言配命自求
多福亦在乎君身而已矣

惟我商王布昭聖武代虐以寬兆民允懷

此一節書是溯商之得天下以其有德也商王指成

湯伊尹曰當夏桀造虐之時萬民塗炭天下諸侯無

有能伸大義而為民請命者惟我商王奮天錫之智

勇敷著其德威於天下而興師以伐之易其荼毒斯

民之虐而代以慈惠克寬之仁于是天下之人莫不

信其志在救民歸往愛戴無一人之不悅服也我商

之所以得天下者如此蓋商王除暴救民皆出于德

義之勇故謂之聖武以見非專尚武力取天下也人

君不得已而有赫怒之師能使兆民樂而懷之則庶

幾乎其聖武矣

今王嗣厥德罔不在初立愛惟親立敬惟長始于家邦
終于四海

此一節書是伊尹以嗣德勉王而欲其謹始也罔無
也初言即位之初伊尹曰我先王之有天下以德致
之則王今日嗣先王之位正嗣先王之德也顧即位
之初在王心則志慮方新而德易進在人心則觀望
伊始而德易孚無在不致謹其始可也謹始之道雖

非一端而莫要于孝悌然欲申孝悌之義于天下必
先盡愛敬之道于一身必也盡我愛親之道于此使
天下之愛其親者莫不視我以為法盡我敬長之道
于此使天下之敬其長者莫不視我以為準如是則
愛敬立矣愛敬既立于此則感孚自形于彼始而一
家次而一國終而四海之人此心同此理亦同將孝
悌之心油然以生莫不觀感而興起矣蓋王者必合
愛合敬以成其化王可不勉嗣厥德哉堯舜之道不

外孝弟上以孝弟倡于上臣庶則而倣之則民德厚
風俗同人人親其親長其長而天下平矣孝弟者君
德之始而即王道之成也

嗚呼先王肇修人紀從諫弗咈先民時若居上克明為
下克忠與人不求備檢身若不及以至于有萬邦茲惟
艱哉

此一節書是伊尹述祖德以訓嗣王也肇始也人紀
謂三綱五常之理咈逆也先民謂前輩有德之人與

取也伊尹曰立愛立敬之實事在三綱五常之克修
彝倫之理本在天壤間不可泯沒自桀以昏德而廢
棄之我先王始起而修明焉使此理復燦然于天下
先王知從善者君德之要凡臣下之來諫者必虛心
聽受而無有拂逆先王知耆舊者君德之輔凡先民
之有德者必屈己順從而與之同心其居上也民情
無不照察邪佞無所欺蔽能盡臨下之道而克明其
為下也進賢至于再三蒙難無所于避能盡事上之

道而克忠取人之善則隨才任使而不為求全檢己之身則惟日孜孜而常恐不及我先王于上下人己之間無不各盡其修如此是以德日以盛而天與人歸由七十里以至于有萬邦而業日以廣也此其積累締造之勤可謂難矣王可不嗣厥德以思其艱哉自古人君未有不由艱難而得創業與守成總無二道要惟持此克艱之意斯可矣

敷求哲人俾輔于爾後嗣制官刑儆于有位曰敢有恒

舞于宮酣歌于室時謂巫風敢有殉于貨色恒于遊畋
時謂淫風敢有侮聖言逆忠直遠耆德比頑童時謂亂
風惟茲三風十愆卿士有一于身家必喪邦君有一于
身國必亡臣下不匡其刑墨具訓于蒙士

此二節書是言先王求治人以輔後兼立治法以儆
臣也敷廣也官刑官府之刑恒常也酣歌謂酒後狂
歌巫是歌舞以事神之人風風俗也淫過也墨刑鑿
其額而涅以墨也蒙士蒙童初學之士伊尹曰先王

之得天下甚難其慮天下亦甚遠不特自修人紀已也又必廣求賢哲布列在位以輔佐于爾後人使將順其美匡救其失庶幾保先業而不至于廢墜也然使哲人輔之佞人從而敗之君德何由成乎又制為官刑以儆有位其儆戒之詞曰凡爾有位雖有宴樂當節以禮敢有卜晝卜夜而恒舞于宮縱酒沉湎而酣歌于室是正人而為巫覡之事也謂之巫風雖有玩好當適其宜敢有貪嗜貨財耽好女色盤遊無度

畋獵非時是放蕩而無檢也謂之淫風尊賢惡佞尚
德遠讒此常理也敢有侮慢聖人之言拒逆忠直之
諫踈遠老成有德之士狎比頑鈍無恥之徒是好惡
拂其常也謂之亂風惟茲三風十愆其足以壞人心
頽世道不必全此而後喪亡也為卿士者有一于身
則必喪其家為邦君者有一于身則必亡其國況天
子乎若天子而犯此風愆則在有位者皆當盡言直
諫以匡扶其過若隱忍坐視而不言是食君之祿而

不忠者也則必以墨刑加之不特儆于有位也彼蒙
童初學之士亦皆以此訓誡之欲其入官而知所以
正諫縱使老成凋謝猶賴有繼起之忠良得而用之
先王之為後嗣慮者其深且遠如此吾王其可不知
戒哉古者凡為人臣皆有進諫之責先王非獨勸之
使言又刑之使不得不言此開廣聽納之良法也

嗚呼嗣王祇厥身念哉聖謨洋洋嘉言孔彰惟上帝不
常作善降之百祥作不善降之百殃爾惟德罔小萬邦

惟慶爾惟不德罔大墜厥宗

此一節書是伊尹訓太甲之終而又以天命人事申
警之也祇敬也洋洋廣大之意孔甚也伊尹終訓于
王曰嗚呼我王其以三風十愆之訓敬之于身而不
忽念之于心而勿忘哉蓋此先王之訓乃聖人之謨
也經畫于當年之心廣大悉備不洋洋乎且此先王
之訓皆嘉美之言也告戒夫有位之衆明白簡切不
孔彰乎此王之所當敬念者也且上帝之命去畱無

定作善者則諸福咸集而降之百祥作不善者則諸惡畢至而降之百殃天道之不爽如此是故一念之善德雖小也勿以善小而不為萬邦之慶積于此矣小善何能致慶而敬德之一念即其慶也一念之不善不德雖小也勿以惡小而為之厥宗之墜肇于此矣小惡未必即墜而滅德之一念即其墜也禍福之機相為倚伏如此為嗣王者容可不敬念哉按伊訓一書反覆勸戒丁寧周悉而終之以祗厥身之一言

蓋王者修德凝命無過一敬能敬其身則十愆並去而百祥自臻然後可以嗣祖德承天休也大臣忠愛之心纏綿深切此伊尹所以為社稷臣與

太甲上

太甲不明于德伊尹屢訓之不聽乃營宮于成湯陵墓奉太甲居之使知省改後果悔悟處仁遷義伊尹迎之歸亳卒為令主史臣述其事及其訓戒之詞為書三篇名之曰太甲而此則其上篇也

惟嗣王不惠于阿衡伊尹作書曰先王顧諟天之明命以承上下神祇社稷宗廟罔不祇肅天監厥德用集大命撫綏萬方惟尹躬克左右厥辟宅師肆嗣王丕承基緒

此二節書是推伊尹所以作書之由而先述祖德以告太甲也惠順也阿衡商之官名阿是倚衡是平言天下所倚以平也顧常目在之也諟此也明命上天命我顯然之理監視也辟君也宅居也師衆也史臣

曰昔伊尹居阿衡之任是天下之所倚以為平正嗣
王所當順從者乃太甲即位之初不明于德狎比羣
小而不惠于阿衡于是伊尹懼而作書以告曰天人
之交至近而非遠也先王成湯見得上天有顯然之
理而畀之在我者謂之明命于是提撕省察念念不
忘知此理隨處流行使此心隨在有覺常若接于目
而真有所見者然由此以奉承天地神祇社稷宗廟
極其誠敬而無一毫怠忽之意故上天監視我先王

之德足以代夏而有天下遂舉大命集于其身使撫綏安定萬方之衆此時我尹躬又能盡心竭力左右輔相我先王以安宅斯民臣主同勞如此故嗣王得以大承其基業而膺此無疆之休也伊尹述成湯之德其要莫切于顧諟明命之一言顧諟明命猶詩所云不顯亦臨無射亦保雖一息之頃一事之微皆天理之周流而無有怠忽之意乘其間者此所以能承上下神祇社稷宗廟而罔不祇肅也所謂祇肅亦惟

凜敬畏于平時而已

惟尹躬先見于西邑夏自周有終相亦惟終其後嗣王
罔克有終相亦罔終嗣王戒哉祗爾厥辟辟不辟忝厥
祖

此一節書是又舉夏事以儆嗣王也夏都安邑在商
亳都之西故曰西邑夏周忠信而無虧之意祖指成
湯伊尹曰從來君臣一體休戚相關未有君不君而
臣獨得以自全者我嘗見西邑之夏其先王皆有忠

信之德誠意相孚能享國長久而有終故當時輔相之臣亦能與國咸休而有終其後夏桀無道不能有終故其輔相者亦與之同其僂辱而不能有終可見君安則臣亦安君危則臣亦危也嗣王今日其可不以夏桀為戒哉惟當敬爾所以為君之道而勉于忠信若君而不君則不能丕承基緒而忝辱其祖矣雖有臣欲盡忠匡輔又何足恃哉可見人君與臣相須甚切賢臣必責難于君賢君必以難自責君臣皆以

不終為戒此所以克有終也唐虞之治亦自君臣咨
傲致之豈獨夏先王哉

王惟庸罔念聞伊尹乃言曰先王昧爽丕顯坐以待旦
旁求俊彥啟迪後人無越厥命以自覆

此二節書是又因太甲之不順而再陳先德以勸之
也昧爽天將明未明之候丕顯大顯其德也日出曰
旦俊彥有才德者旁求多方求之啟迪開發之意越
謂顛墜覆敗亡也史臣曰伊尹作書之意至真切矣

乃太甲但視為尋常罔有念及而若不聽聞者于是
伊尹乃言曰王亦知先王為善之勤而慮後之遠乎
先王每當昧爽之時澄神滌慮使虛靈之體湛然畢
露以大顯明其德若心有所得則汲汲然坐以待旦
舉而行之蓋先王之心惟恐修于己者有未至而施
于事者有未及也又恐後世子孫溺于宴安罔念先
德則又博求天下才德兼全之士置之左右以開導
我後人使其有所依據皆知修德勤政以保守其先

業也然則為後人者正宜效法其德而聽用其人以
紹先王基緒之隆庶幾無忝厥祖耳其可以縱欲敗
度隕此求賢啟迪之命以自取覆亡哉甚矣古帝王
為善惟日不足而又必樹人以為久遠之計人主而
欲為法乎天下燕翼乎孫子則亦惟修身尊賢盡之
矣

慎乃儉德惟懷永圖若虞機張往省括于度則釋欽厥
止率乃祖攸行惟朕以懌萬世有辭

此二節書是勉太甲慎德以率先也永圖謂遠慮虞
虞人機弩牙也括箭尾著弦之處度射之準則省察
也釋發矢也止當然不易之理懌悅也伊尹曰從來
國家多以縱欲奢侈失之者但知安于一時之樂而
不能為長久之謀也蓋縱欲之源皆起于心不可不
謹我王今日但當慎其儉約之德事事知所收斂而
不至于放肆所懷者皆為永遠之圖謀念不在一日
而在終身志不在一時而在百世則不至隕厥命而

覆亡可免也然王之慎德當如虞人之射弩然虞人之射既張其機矣猶必往察其括之合于法度然後釋之則發無不中人君之處事亦猶是也萬事莫不有度君所以為度在敬汝所當止肅恭謹斂務求義理所在而審處之耳然不必遠求也若乃祖之所行即是其所當止但視當時所已行者而率循之無敢踰越王能如是則事事合宜動無過舉近可以慰悅尹心而不負先王所託遠可以有譽萬世而為守成

之令主矣王可不自勉哉可見守約者施博慎儉德
懷永圖皆守約之事而其效至傳令名于萬世以視
秦皇漢武侈心自放者何如哉

王未克變伊尹曰茲乃不義習與性成予弗狎于弗順
營于桐宮密邇先王其訓無俾世迷王徂桐宮居憂克
終允德

此三節書是史臣叙太甲不從尹言而尹遷之桐宮
以興起其善也狎是狎習弗順謂不順理義之人桐

地名成湯陵墓所在徂往也史臣曰伊尹之訓辭誠懇已至王于尹言自宜心動但習染既深猶未克變伊尹乃私計之曰我觀王之所為多不義之事習為不善若天生性成者然此必左右近習有不順義理之人從臾以導其為非者我不可使其狎而近之于是營宮于桐使親近先王陵墓儉人既遠祖德相依以是訓之庶幾朝夕哀思善念興起無使終身迷惑而不悟也王既往桐宮居憂三年果能自怨自艾盡

改其平日之所為實有其德于身而不至終迷矣孟子稱堯舜性之湯武反之可見性之者少當慎習以復性也太甲要非生而不德所狎之人不順耳遷桐之舉使無小人在側而如有先王在前則非僻消而其習端矣推而言之程頤所云接賢士大夫之時多必能養成聖德正謂此也

太甲中

此伊尹奉迎太甲歸亳之後勉以修德法祖而史臣

述其君臣往復之語為中篇

惟三祀十有二月朔伊尹以冕服奉嗣王歸于亳作書
曰民非后罔克胥匡以生后非民罔以辟四方皇天眷
佑有商俾嗣王克終厥德實萬世無疆之休

此二節書是記太甲改過之初而伊尹始迎歸以致
慶也胥相也匡正也史臣曰太甲居憂于桐宮能悔
過遷善到三年之時服制已滿伊尹乃于歲首十二
月正朔之日用袞冕之服奉太甲復還歸于亳都而

作書以告曰從來君與民實相須為理者也民非君則不能相正而得遂其生民固不可無君君非民則何以君臨四方而奉之為主是君尤不可無民也我王當不明于德之時上下皆不能保民幾無君而君幾無民矣幸賴皇天眷顧佑我有商使嗣王幡然悔悟能終其德是舉商家之基緒將墜者今日自是其可久子子孫孫皆得以享靈長之慶矣豈不為萬世無窮之休美乎方太甲未明厥德尹惟盡人事所當

為及克終允德則又歸之皇天之眷佑蓋惟盡人事
乃所以迓天休而人事未盡不得輒諉之于天者有
如此

王拜手稽首曰予小子不明于德自底不類欲敗度縱
敗禮以速戾于厥躬天作孽猶可違自作孽不可逭既
往背師保之訓弗克于厥初尚賴匡救之德圖惟厥終
此一節書是太甲致敬于伊尹而求善終之道也底
致也不類猶言不肖戾罪也孽謂災逭逃也師保謂

伊尹太甲既痛改前過乃知伊尹之忠遂拜手稽首而致其敬師之禮曰予小子向者昏迷沉溺罔識天性之本善而不明于德以自入于不肖嗜好無節壞其奉身之度縱肆不恭壞其修身之禮以自速罪戾于其身夫天欲降災尚賴人事可以修救若人所為不善則孽自我而作者又安可逃乎余往者既背師保之訓不能謹之于始尚賴正救之力繩愆糾繆以求成就于有終哉蓋往者雖悔無及而來者則猶可

圖也從來帝王不貴無過而貴改過太甲悔過之言
深合帝王自治之旨雖欲不謂之有商令主不可得
也

伊尹拜手稽首曰修厥身允德協于下惟明后先王子
惠困窮民服厥命罔有不悅並其有邦厥鄰乃曰徯我
后后來無罰

此二節書是伊尹告太甲以修身之道而援先德以
示之也允者誠實之謂協和也先王指成湯無罰言

免于暴虐伊尹見太甲悔過求助乃拜手稽首而致其敬君之禮曰王今者知不明于德而悔欲縱之為戾于厥躬是欲使德之不明者而務明之也此其功端自修身始必也嚴于自治使從前之積習猛力以去之從後之造詣畢力以精之如此則可無敗度敗禮之事矣由是出乎身而加乎民將誠實之德孚契于人自然人心協和無不愛戴此惟明后為然非昏昧者所可及也然所謂明后孰有過我先王者乎先

王之德無所不允遂無所不協若民之困窮而可憐者尤必曲加體恤而惠之若子故當時亳邑之民服其命令無不得其懽心且非特本國之民如此也即其時並我邦而為鄰國者其民苦其君之暴虐亦莫不愛戴我先王皆曰待我君來君來其可無酷罰矣乎此惟先王之允德協下而所以得民心也王今可不以先王為法哉可見人君以修身為本身修則未嘗要結于民而民自歸之所謂以德服人中心悅服

者此也

王懋乃德視乃烈祖無時豫怠奉先思孝接下思恭視遠惟明聽德惟聰朕承王之休無斁

此二節書是伊尹欲王以懋德而告以懋德之實事也惟即思也斁厭也伊尹曰我先王之允德協下蓋惟能日新其德而遂致得民如此也王今繼承大統正當乘此怨艾之初勉修其德凡事一視烈祖之所為以為準則而無使一時有逸豫懈怠之意如是則

可與烈祖之德相似矣然懋德之事何如當奉祀先祖也則思何以仰承而善繼善述以盡其孝當接見臣下也則思何以禮貌而聽言納諫以盡其恭欲遠見萬里之外當使九州之休戚利害無不周知而思明明則不蔽于淺近矣欲聽納道義之言當使百執事之謨謀獻納聞言即悟而思聰聰則不惑于儉邪矣王能于是四者身體而力行之則懋德法祖王之休也尹承王之休美益思左右匡救而不遺其力矣

其何敢厭數哉伊尹陳保終之道反覆勸勉不過法祖盡之而孝恭明聰則法祖之實也大臣愛君不以寵眷爵祿為休而以君之修德為休抑何忠誠之篤乎

太甲下

此伊尹申告太甲以修德保治而史臣叙其語為下篇

伊尹申告于王曰嗚呼惟天無親克敬惟親民罔常懷

懷于有仁鬼神無常享享于克誠天位艱哉

此一節書是伊尹告太甲以君道之難也伊尹重言以告于王而歎息曰人主一身上為皇天之所式臨而明則為萬民所依幽則為鬼神所鑒誠無有一之可忽者也惟天居高在上有尊無親然敬者事天之理也人君能敬以自持凡動靜語默無一念之敢忽則天乃眷佑而親之矣民情向背初無恒情然仁者治民之理也人君能仁以保民撫綏鞠養無一夫之

不被則民乃歸往而懷之矣鬼神幽隱最為難測然
誠者祭鬼神之理也人君能竭誠對越使實意感孚
一氣相為聯屬則鬼神自降福而來享矣可見人主
居天之位一念不謹則不免于褻天慢神虐民之咎
其可以易而忽之哉甚矣天位之難而居天位者不
可不思其艱以盡其道也夫人主一身而天民鬼神
之心屬焉天民鬼神之心無常而人君之為敬為仁
為誠則可以有常其權亦在人君自操之耳

德惟治否德亂與治同道罔不興與亂同事罔不亡終始慎厥與惟明明后

此一節書是伊尹告太甲以治亂之所關終始之宜慎也伊尹之言曰天位維艱人君所以常保此位者亦在乎仁敬誠三者之德而已有是德則天佑之民懷之鬼神享之而足以致治無是德則天之所不佑民之所不懷鬼神之所不享而足以致亂古之人有以德而致治者矣人君之所行能與治世之道事事

相同誠敬以格天神仁愛以撫民衆則國未有不興者古之人亦有以否德而致亂者矣人君之所行苟與亂世之事有一相同或耽于貨色或淫于遊畋或恣于刑戮或蔽于奸邪則國未有不亡者治亂安危亦在乎慎所與而已然人情謹始而怠終誠能自踐祚之初至歷年之久兢兢業業皆與治世之道相同而不使一事苟同于亂世則治可常保矣此惟明哲之君深明乎天人治亂之理而不為嗜慾所搖奪者

能有此也欲保維艱之天位尚其慎所與哉漢唐以
來治亂興衰之故備在史冊其興必有所以興其亂
必有所以亂人君察其大綱而于用人行政之間自
相衡度則不越已然之陳迹而可以知無窮之治亂
正古人所謂人毋于水監當于民監之說也

先王惟時懋敬厥德克配上帝今王嗣有令緒尚監茲
哉

此一節書是伊尹勉太甲法湯以圖治也懋勉也配

對也監視也伊尹之言曰與治同道不必遠求我先王成湯能朝夕懋勉以敬修其德純粹無私與天合一故足以配乎上帝而為臨御萬方之主今王所嗣者先王令善之統緒亦惟視先王之懋敬者以為法而可哉蓋君德莫大于能敬而敬莫貴于能勉懋敬則仁與誠在其中克配上帝則民懷而鬼神無不享矣語其用力之始則曰懋敬語其功化之極則曰配帝先儒謂伊尹徹上徹下以告太甲誠聖學之心傳

而君德之要領與

若升高必自下若陟遐必自邇

此一節書是伊尹告太甲以進德之有序也伊尹之言曰先王之敬德足以配天觀法乎先王者豈能一蹴而至其精微之域哉先就一言一動之間時存敬畏馴至于無時不敬無事不敬念念合乎天理而不叅以一毫私欲之累則配天之詣不難至也若升高者然必自下而後高可漸登若陟遐者然必自邇而

後遠可漸至此又法祖進德者所宜知也蓋下學上達者乃聖功而欲速躡等者非王道謹言動之幾微則義精仁熟之本也同生民之休戚則久道化成之基也不希心于高遠亦不自畫于卑近盛德大業在是矣

無輕民事惟難無安厥位惟危慎終于始有言逆于汝心必求諸道有言遜于汝志必求諸非道

此三節書是伊尹告太甲以重民事慎天位謹始聽

言之道也民事農桑之事也厥位人君之位也逆違拂也遜隨順也伊尹之言曰人君富有四海享萬方之奉而不知稼穡之艱難輕視民事者有之矣不知小民終歲耕鑿尚有不足于食者終歲蠶桑尚有不足于衣者慎毋輕民事而思其難可也人君撫有成業居九重之尊而不察天心之向背安視厥位者有之矣不知一念所動天意視為去畱一事所施民生視為休戚慎毋安厥位而思其危可也人情莫不欲

令終而必先慎之于其始嗜慾之萌偶開其端而後必至于橫決政令之發姑為嘗試而害已極于無窮未有始之不善而可以善其終者聽言尤人主之要道惟當求義理之正不當徇意見之偏如其言忠鯁激直犯顏色觸忌諱是逆于汝心之言也逆耳之言難于聽受當虛心平氣思其言果有益于身心果有裨于治理是于道有合也則不難屈己以從之自此忠言讜論日聞于前矣如其言阿順從諛窺色笑承

意旨是遜于汝志之言也諧媚之言易于聽納當清
心體察思其言恐卑順以取容恐逢迎以取悅果其
非道也則不難正色以拒之自是讒諂面諛不至于
前矣聽言之要道無出于此者人君臨御天下察邪
正決安危辨是非莫大于聽言一斷之于道則明鏡
在懸妍媸立辨善乎伊尹之言朱子以為治道別無
說能此則未有不治者惟在人君虛己以聽之而已
嗚呼弗慮胡獲弗為胡成一人元良萬邦以貞

此一節書是伊尹勉太甲以慎思篤行而言其效之大也慮思慮也胡作何一人指君身也元大也良善也貞正也伊尹之言曰臣前所言者皆進德保民聽言致治之要道誠能不徒聽其言而實思其理極深研幾窮微達變始可以得其理之當若弗能思慮則亦泛聽而已何由而能得乎誠能不徒思其理而實為其事勉強力行精明果斷始可以望其功之成若弗能有為則亦徒思而已何由而有成乎為人君者

百辟奉為儀型萬民視為表帥一身所繫至大也能
慮則理無不當而是非邪正不能淆能為則功無不
成而艱鉅險阻不能惑所存者皆先王懋敬之心所
行者皆先王懋敬之事而一人有大善之德矣由是
而顯足以建極陳常微足以潛移默化百官正于朝
而在廷無佞諛萬民正于野而四海有同風豈非與
治同道之極功哉蓋哲謀為作聖之基而行健乃君
德之大慮欲其周為欲其敏保天位以懷小民莫切

于此

君罔以辯言亂舊政臣罔以寵利居成功邦其永孚于休

此一節書是伊尹將復政于太甲戒其變亂先王之法度且自言成功之宜退也伊尹之言曰為君者有清淨寧一之德而不自驚于聰明為臣者有恬澹廉讓之風而不自苟于去就然後政治以肅而風俗以醇蓋祖宗舊章昭垂已久人君但當恪守成憲不可

逞一己之臆見聽喋喋之利口而紊亂先王之舊政
人臣事君雖功蓋天壤不過自盡其職分故匡君定
辟當毅然而有為功成身退宜澹然而不有不可以
己之事功已成而貪戀寵利以居之能如此則朝無
紛更而有不愆不忘之美臣無倖位而鮮患得患失
之風邦家有不永信其休美者哉人君之辯言亂政
大都成于寵利之臣蓋固寵之念深必不能犯顏敢
諫于前且從而將順逢迎于後故人主貴難進易退

之臣而後收糾謬繩愆之益也

咸有一德

伊尹當太甲遷善之後而已將告歸之時作此書勉太甲法成湯以純一其德也因書中有咸有一德之語遂以名篇

伊尹既復政厥辟將告歸乃陳戒于德曰嗚呼天難諶命靡常常厥德保厥位厥德靡常九有以亡

此一章書是伊尹以一德勉其君此二節乃史臣叙

伊尹作書之由而首舉其天命難恃之說也謚信也
九有九州也史臣之言曰太甲居桐伊尹身攝朝政
及太甲君德既成伊尹以所攝政務復于乃辟已將
告老歸于私邑然其勤懇愛君之意猶恐已去而君
德未純有小人得以間之故以德之當勉陳戒于君
其言曰嗚呼人君膺天命而有天下勿恃天心之眷
顧景命之維新當思天難信而命靡常也靡常之命
不可恃而所恃以凝命者惟德人君之德能純一不

雜始終無間則為天命之所歸而常保厥位矣人君之德或私蔽而欲乘或始勤而終怠則為天命之所棄而九州不可保矣天命之維繫于德者如此由此言之難信者未始不可信靡常者未始無定在亦懋勉于德而已德純而不雜所以能久而不息或作或輟皆由私欲間雜故耳

夏王弗克庸德慢神虐民皇天弗保監于萬方啟迪有命眷求一德俾作神主惟尹躬暨湯咸有一德克享天

心受天明命以有九有之師爰革夏正

此一節書是伊尹舉夏之所以亡商之所以興以為
天難諶命靡常之証也庸德常德也一德純一之德
也享解作當師衆也夏正有夏建寅之正朔也革改
也伊尹之言曰皇天無親惟德是輔往事不遠君其
鑒之昔夏桀膺祖宗之緒而有天下但因其徇私
縱慾弗能有此純常之德褻慢神明而不知敬暴虐
生民而不知恤是以天心厭棄而保佑不加于是下

視萬邦之人有能克受天命者以啓發而開導之求其德之純一不雜而特加眷顧使受天命以為百神之主斯時也惟尹躬暨我先王成湯皆能兢兢業業有此純一不雜之德克當上帝之心而受其光大顯明之命九州之衆莫不來歸有夏建寅之正爰革而為有商建丑之正矣夫夏王有天位者也以弗克庸德而亡成湯未有天位者也以咸有一德而興豈非往事之明驗哉觀人君之失德莫大于慢神虐民則

知人君之修德莫大于敬天勤民然非有純誠之德則敬或等于具文仁或流為干譽必如成湯之不邇聲色不殖貨利聖敬日躋而後可哉

非天私我有商惟天佑于一德非商求于下民惟民歸于一德

此一節書是伊尹反覆天人相與之故而言惟德之可恃也伊尹之言曰天之眷夏久矣一旦轉而為有商之命豈天之私于我商哉惟我君臣咸有一德夙

夜寅恭馨聞于上而為天心之所眷佑耳民之戴夏
久矣一旦變而為有商之民豈我有所要求于百姓
哉惟我君臣咸有一德克寬克仁彰信兆民而為民
心之所歸往耳可見天心至微而難于圖度民心至
渙而難于要結惟君臣咸有一德自收天與人歸之
效後世假讖緯以矯誣天命借權術以籠絡人心亦
未明于斯旨耳

德惟一動罔不吉德二三動罔不凶惟吉凶不僭在人

惟天降災祥在德

此一節書是伊尹決言一德感孚之不爽也二三言德之雜而不純也僭差也伊尹之言曰人君之德誠能純乎天理而無理欲之間雜確乎有常而無始終之遷改則德惟一矣以此而格天保民舉動之間罔有不吉者若未能純乎理而不無嗜慾之雜乘僅能持于暫而不能必永久之弗渝則德二三矣由此而上拂天心下違民願舉動之間罔有不凶者夫修之

則吉悖之則凶吉凶之在人未嘗少有僭差者何哉
蓋由天心無私惟德是視德惟一則為嘉祥之所集
德二三則為災患之所叢天未嘗有意于其間也欲
祈天而永命舍德何以哉蓋一德者至純至正不偏
不雜非獨即于匪彝謂之二三其德即一毫近于功
利涉于好名即二三矣天心之降鑒至邇而至密可
不戒哉

今嗣王新服厥命惟新厥德終始惟一時乃日新

此一節書是伊尹勉太甲之自新其德也伊尹之言曰天心鑒觀人心繫屬全在人君即位之初今嗣王新服天子之命正當震動恪恭以自新其德然人情不難振作于一時而難堅固于持久惟自始至終純一無間則是德乃光明純粹而有日新之盛矣上言一德此言新厥德者一德自成功而言新德自用功而言德必新而後能一常使清明在躬志氣如神不為氣拘物蔽而後可幾純一之德也盤銘有日新之

言仲虺亦云德日新萬邦惟懷此殆有商之家學而
伊尹亦以勉其君與

任官惟賢才左右惟其人臣為上為德為下為民其難
其慎惟和惟一

此一節書是伊尹告太甲以任人輔德之道也官謂
庶官也左右謂輔弼大臣也伊尹之言曰君德期于
日新然或任用匪人得以間之外蔽聰明內惑心志
德未有能終者庶官百職各有攸司必得賢而有德

才而有能者以任用之始可以無曠厥事若左右輔
弼之大臣處大事決大疑論道經邦調元贊化必其
人可以堪此任者而後用之又不徒尋常賢才而已
也蓋人臣之道其為上也則輔成君德開導啓沃于
平時糾繆繩愆于臨事使君德清明于上是其職也
其為下也則休養生民大臣有興利除弊之權小臣
有宣化承流之責使民生又安于下是其分也然則
人臣之繫于國也不綦重哉故其方用之也未能灼

知其賢才則難于任用而不輕授以官慎于審察而必詳核其實惟恐小人得伺其間也及其既用之也已灼知其賢才則和以待之猜忌可以盡捐彼此可以相濟一以任之毀譽不得雜乘初終無所疑貳惟恐君子不得盡其才也如此則任用之道得而君臣一德之治成矣蓋其難其慎者勞于任人也惟和惟一者逸于圖治也未有參之以二三疑之若衆人而君子能行其志者任賢勿貳即此旨與

德無常師主善為師善無常主協于克一

此一節書是伊尹告太甲以取善之道也伊尹之言曰天下之理原于一本而散為萬殊人君必有所師法而後成其德然德無常師也凡左右庶官以及夫典謨訓誥下至芻蕘工瞽苟有一言之善一事之善皆可主而為師如是則有以盡乎一本萬殊之理而所取者博而不窮然善有萬端泛而主之又懼其雜也故善無常主必揆度于心而務合乎至當不易之

理此所謂能一也如是則有以達夫萬殊一本之妙而所主者約而可守由是萬善歸懷而衡鑒不爽君德修而政治舉矣蓋德以事言善以理言一以心言德無常師主善為師者精以擇之也即虞書之所謂惟精大舜之好問好察隱惡揚善也善無常主協于克一者一以貫之也即虞書之所謂惟一大舜之執兩端而用中也伊尹樂克舜之道淵源甚遠故其告君者亦如此非萬世取人為善之極則哉

俾萬姓咸曰大哉王言又曰一哉王心克綏先王之祿
永底烝民之生

此一節書是伊尹告太甲以一德之效也俾使也綏
安也底定也烝民衆民也伊尹之言曰人君之德能
純一不雜則號令詔諭之施必能寬仁愷惻明允篤
誠而有以感動乎天下之人心使萬姓咸曰大哉王
言洵天理人情之極則萬世子孫之明訓也因其言
而知其心又相與頌曰一哉王心深宮無非僻之私

君志建清明之極也一德之感必有如此者且先王受天祿而富有四海王以一德承之自能保定孔固措國家于磐石之安而先王之祿其克綏矣烝民戴一人以為元后王以一德臨之自能撫綏教養登蒼生于衽席之上而烝民之生其永底矣一德之驗有必如此者蓋草野之視聽不可欺而君心之感通為甚速王言出如絲綸言乎有倫有要也王度式如金玉言乎不貳不雜也得則萬姓頌之失則萬姓訾之

可不慎與

嗚呼七世之廟可以觀德萬夫之長可以觀政

此一節書是伊尹告太甲以得失之不可掩于天下
後世而為警醒之詞也伊尹之言曰嗚呼人君嗣位
則為人之子孫異日入廟則為人之宗祖天子之制
七廟三昭三穆與太祖之廟而七必功德隆盛者始
稱宗而為不遷之主不然親盡則祧不得列于七廟
之中雖孝子慈孫不能私其祖父然則七世之廟不

可以觀德乎人君以一身託于臣民之上撫我則后
虐我則仇民罔常懷懷于有仁必善政誕敷則愛戴
而為太平之主不然羣心不固安能侈然于萬民之
上雖赫聲濯靈亦不能束其異志然則萬夫之長不
可以觀政乎政之得失不能掩于當時德之純疵不
能掩于後世亦可惕然深念矣

后非民罔使民非后罔事無自廣以狹人匹夫匹婦不
獲自盡民主罔與成厥功


此一節書是伊尹廣言取善之量而欲其無遺于百姓也伊尹之言曰人君欲成一德之治則內而百官外而萬民皆為我取益之地勿謂百姓至愚賤也人君非民則孤立于上而何所任使百姓非君則渙散于下而何所統束其相須也如是故君雖神聖而詔鐸必懸芻蕘不棄皆所以集思而廣益若自恃聰明謂人之識見一無可取是自廣以狹人也其可乎蓋雖匹夫匹婦其一得之愚亦有足錄者若因其愚賤

使之不能自盡其誠則聰明壅而識見隘民主亦罔與成厥功矣匹夫匹婦且然况百官庶尹為吾之所任用輔弼左右為吾之所顧託而使之不能盡其誠以入告殫其才以有為猶可以成治功者乎此篇言君德最宜純一必也去欲存理使本體湛然而又慎簡臣工旁求俊乂以至匹夫匹婦一善不遺然後可澤被當時譽延後世而成配天之業也人君修德之要此書盡之矣

日講書經解義卷四

謹案第四十五頁前五行當于民監之說也刊本
民作人據經文改





總校官庶吉士臣侍朝

校對官檢討臣王鍾健

謄錄舉人臣王旭暢